

մենայն աւուր պտրտին գնալ յեկեղեցին և ձայնաւոր ժամա ասել, և ի պատարագի գտանիլ, զի եթէ մինն ի քահանայից ոչ երթիցէ յեկեղեցին, կորուսանէ զնոյն աւուր եկամուտն:

Եւ եկեղեցիք նոցա բոլորակ են, և կէս միջաց չափ բարձրութեամբ վանդակաւ յերկա բաժանեալ են, և ի մէջ տեղին մատուցանի պատարագ քահանայիւր և սպասաւորօք, երկրորդ տեղին է դեռ ոչ ամուսնացելոց, երրորդ տեղին է ամուսնացելոց: Եւ չորրորդ տեղին է արտաքոյ յարկի եկեղեցւոյն՝ մեղաւորաց, որք են ի սրահն եկեղեցւոյն և բացօթեայք են: Զի թէ ի մէջ ամուսնացելոց և թէ ոչ ամուսնացելոց ի մեղս ինչ անկանիցի ոք, ըստ իրողմտանաց իւրոց ոչ գնայ ի յիւր տեղին ի մէջ եկեղեցւոյն, այլ ինքնին գնացեալ կանգնի յայն տեղին մեղաւորաց, մինչեւ խոստովանեսցի, և ոչ որ յամօթ առնէ զնա թէ մեղուցեալ իցէ:

Իսկ ի զլուխ քահանայից արտաքոյ եկեղեցւոյն շապղայակերպ սպիտակ բեհեզ փաթութեալ է, բայց զագաթ նոցա բաց է, և ի ժամերգութեան հաննն զայն զըլխարկն. և առնուն ի ձեռս իւրեանց զօրէն խաղաղկաց զչալրարա, և ոմանք ջնդրտաղ, և ի յերգս ի տեղիս տեղիս հարկանելով մին զմիւսն ձայնս արձակէ, և երբեմն եւս ծափ զծափի հարկանեն, և երբեմն ի վեր ոստոստեն ժամ ասացողքն: Ահա այսու կերպիւ է ժամասացութիւն նոցա:

Իսկ աշխարհականք ի ցոյցս՝ պսակաւ մի կին ունին, բայց ոմանք զհարճս եւս պահեն, և ի հարճից ծնեալ զաւակն եւս համարձակ պահեն, բայց նոյն զաւակքն չեն ի պատուի և ի վարկման:

Այլ եւս թէ ի հասարակ մարդկանց և թէ ի մեծամեծաց մեռանիցի ոք, ազգականք և կամ մօտաւոր բարեկամք նոցա և սպասաւորքն, ապականեն զերեսս և զճակատն իւրեանց, զի սպառուածօք չուխայի այնքան շփեն զերեսն և զճակատն մինչեւ հեղուն զարիւնս առ ի տանիլ զսուգն մեռողին:

Այլ եւս յոյժ զարմանալի և լսողաց

անհաւատալի լուացք ունին, որ թո՛ւմա՝ ճանն եւս զիւր հանդերձսն տայր լուանալ այնու կերպիւ: Նախ լուացողքն են այր մարդիկ, և տանին զաղտեղեալ հանդերձն յայն գետոյն և ծաւալեն զմեծ կո՛ւլու կաշի մի և շուրջ զնովաւ շարեն քարինս, որովք ի մէջն փոս լինի, և անդէն լնուն նախ զսպիտակ հանդերձսն և զցուրտ ջուրն, և ոտիւք կոխոտելով և ի վեր վեր ոստոստելով և երգս երգելով թանայ զամենեսեան: Ապա տեսցուք այժմ որ ցուրտ ջրով և առանց ջնոուցեալ մոխրէ ջրով և թարց օճառի ո՞րպէս կարիցէ սպիտակացուցունել զիւղաճենճեր թաթաւեալ և զսեւացեալ զհանդերձսն: Ահա սովաւ, զի անդ ի հապէշ տեսակ մի ընդոյ բուսանի, ժողովեն զայն և չորացուցանեն, և ծեծեն և մոխրագոյն փոշի լինի, և ի յայս փոշւոյ զերիս և զչորս բուռս ածէ ի վերայ հանդերձիցն, և սկսանի վերստին կոխոտել, և յայնժամ փոփրի առաւել քան զօճառն, ապա թափէ զջուրն, և այսպէս երկս առնելով որքան ճենճերոտ և իւղոտ սեւացեալ իցէ, մաքրի զտի և իրրեւ զծին սպիտականայ: Ըստ այսմ կերպի և զգուհաւոր լուացումն հանդերձից առնեն...:

Այլ եւս գիտասջիւր զի ի յերկիրս հապէշու բազմատեսակ հանք գոն, որպէս կարմիր պղինձ, դեղին պղինձ, այլեւս երկաթ բազում, ի գնալն ի Տիքսէէն մինչև ի Ատվայ և ի կեօնտէր ի բազում տեղիս ի ճանապարհին ի վերայ երկաթոյ ընթանային: Սակայն ոչ ունին զայնքան անտառս, զի խալհանէս արասցեն. և ոչ եւս գիտեն զառնելն, որպէս զոսկւոյ եւս զտելն ոչ գիտեն: Զի հեռի ի կեօնտէրէն երկու երեք աւուրց ճանապարհաւ գոյ բարձր լեռոն մի ոսկւոյ՝ յոր ոչ կարեն ելանել, և սպասեն զի յորժամ մրրկաւ և կարկտով անձրեւեսցէ, յայնժամ ջրոյ և կարկտի բռնութեամբն ընդ ջրոյ ոսկիքն իջանեն ի վայր, և լինի ի ներքոյ լերին ծով մի. և ապա իրրեւ ցամաքի ջուրն և չորանայ, յայնժամ առաքին ի թագաւորէն արք երկերիւր ի պահել և ի ժողովել զոսկին, համանգամայն եւս զողանալ: